

15. maj 2006

UPA2006/29

**Nakorsaatit pillugit Inatsisartut peqqussutaata allanngortinneqarneranik
Inatsisartut peqqussutissaattut siunnersuut.**

pillugu

Inatsisartut Peqqinnissamut Ataatsimiititaliaata

ISUMALIUTISSIISUTAA

Siunnersuutip aappassaaneerreqarnerani saqqummiunneqartoq

Inatsisartut Peqqinnissamut Ataatsimiititaliaat suliarinninnermini ukuninnga
inuttaqarpoq::

Inatsisartunut ilaasortaq Jens Lars Fleischer, Siumut (siulittaasoq)
Inatsisartunut ilaasortaq Vittus Mikaelson, Siumut
Inatsisartunut ilaasortaq Juliane Henningsen, Inuit Ataqatigiit
Inatsisartunut ilaasortaq Jens B. Frederiksen, Demokraatit
Inatsisartunut ilaasortaq Godmand Rasmussen, Atassut

**Ataatsimiititaliap suliarinninnerani tapiliussatut paasissutissat
ilanngunneqartut:**

Tusarniaanermi akissutigineqartut assilineri Inatsisartut Peqqinnissamut
Ataatsimiititaliaata siunnersuummut pineqartumut ataatsimiititaliami
suliarinninnerminnut atatillugu pisariaqartitani aasimavai.

Peqqussutissatut siunnersuut Inatsisartunit siullermeerneqarmat apeqqutit arlaqartut
saqqummiunneqartut pillugit Naalakkersuisunut ilaasortamit oqaaseqaatinik
akissuteqaatinillu imaqartumik allakkiamik Peqqinnissamut Avatangiisinullu
Naalakkersuisumit Ataatsimiititaliaq aammattaaq tigusaqarsimavoq. Allagaq
ataatsimiititaliap isumaliutissiissutaanut ilanngusatut ilanngunneqarpoq.

Siunnersuutip siunertaa:

Nakorsaatit pillugit peqqussummi malittarisassat ulumikkut atuuttut malillugit
Nalakkersuisut suliaassaraat aalajangersassallugu nakorsaatit suut akuerineqartumik

eqqunneqarsinnaanersut, nioqqutigineqarsinnaanersut nunamilu maani napparsimasunik katsorsaanerme atorineqarsinnaanersut. Nakorsaatit pillugit ataatsimiittartoqatigiinnit Naalakkersut toqqarsimasaannit inassuteqartoqarnerata kingorna tamanna pillugu Naalakkersuisut aalajangiippat. Peqqinnissaqarfimmi nakorsanut tunngasutigut, peqqissaasoqarnikkut, nakorsaaserinikkut, allaffissornikkut aningaasaqarnikkullu pissutsinik nakorsaatit pillugit Ataatsimiittartoqatigiit immikkut ilisimasaqarput. Nakorsaatit sorliit akuerisaanerannik Naalakkersuisut aalajangersaanerata nalunaarutinik saqqummiussinikkut pisarpoq.

Qaamatilli tamaasa nakorsaatit amerlaqisut tunisassiarineqarunnaartarput nutaallu takkuttarlutik. Tamatuma pisariaqalersippaa nalunaarutinik nutaanik ingerlaavartumik saqqummiussisarneq tamannalu allaffissornikkut suliaqarfiuvoq nukissanik atuiffiusoq. Ilutigisaanik Nalunaarutinik saqqummiussisarneq piffissamik atuiffiusartorujussuuvoq allaat nakorsaatit nioqqutigineqartut piumaneqarnerisa ineriartornerannut sanilliullugu nalunaarutit nutaat saqqummiunneqartut nutaanngilereersimasarlutik.

Nakorsaatinik inatsisitigut tunngaviliinissamik suliaqartarnerup sunniuteqarnerusumik nukissanillu annikinnerusunik atuiffiunissaa siunnersuutip pingaarnertut siunertaraa. Nakorsaatit sorliit inerteqqutaanerannik nalunaarutinik aalajangersaasarneq qimanneqassasoq taamaalilluni siunnersuutigineqassaaq. Akerlianilli nakorsaat Kalaallit Nunaanni atorsinnaassappat Nakorsaatit pillugit Ataatsimiittartoqatigiit tamanna akuerisassaraat. Nakorsaatit akuerineqartut nalunaarsuiffinnut qaammammut ataasiarluni nutarterneqartartumut ilanngunneqartassapput taakkulu Peqqinnissaqarfiup qarasaasiakkut nittartagaatigut kikkunnilluunniit aaneqarsinnaassapput.

Ataatsimiititaliap eqqarsaatersuutai inassuteqaataalu:

Nioqquteqarfinni ineriartornerup sapinngisamik malinnaafiginissaa nakorsaatit inatsisitigut tunngavissinneqarnera Ataatsimiititaliap taperserpaa. Allaffissornikkut suleriaatsit sunniuteqarnerusut atorluanaanerussullu anguniarlugit Naalakkersuisut suliniarnerat Ataatsimiititaliamit pitsaasutut isigineqarpoq.

Taamaattumik Peqqinnissamut Ataatsimiititaliap isumaqatigiittup siunnersuut akuerineqarqullugu inassutigaat.

Peqqinnissaqarfiup nittartagaani nakorsaatit allattorsimaffiat ima ilusiligaasimassaaq, nakorsaatit ataasiakkaat qanoq ilinerani akuerineqarsimanersut taamaalillutillu inatsisitigut akuersissutigineqarsimanerat ersarissuunissaat assut pingaartuusoq Ataatsimiititaliaq isumaqarpoq. Innutaasut inatsisitigut illersorneqarnissaanut nakorsaatillu pillugit peqqussutip atuutsinneqarnissaanut tamanna pingaaruteqarpoq.

Taama oqaaseqarluni Inatsisartut Peqqinnissamut Ataatsimiititaliaata aalajangiiffigisassatut siunnersuut aappassaaniigassanngortippaa.

Jens Lars Fleischer
Formand

Vittus Mikaelson

Juliane Henningsen

Jens B. Frederiksen

Godmand Rasmussen

[Ilanngussaq](#) (pdf-format)